

2025 წლის დოქტორანტურის საგანმანათლებლო პროგრამების დაფინანსების კონკურსში მონაწილე პროექტებისათვის საბოლოო ქულის დაანაგარიშების, სამეცნიერო მიმართულებებში თანხის განაწილებისა და დაფინანსების წესი

§1. პროექტის საბოლოო ქულის გამოთვლის წესი

1. კონკურსის პირობებთან შესაბამისობაში მყოფი პროექტები ფასდება საქართველოს განათლებისა და მეცნიერების მინისტრის 2014 წლის 30 სექტემბრის №128/ნ ბრძანების მე-10 მუხლით განსაზღვრული პროექტის შეფასების კრიტერიუმების შესაბამისად.
2. თითოეული პროექტის საბოლოო ქულას ადგენს ექსპერტთა ჯგუფი ხმათა უმრავლესობით.
3. დაფინანსების მოსაპოვებლად აუცილებელი, მაგრამ არასაკმარისი პირობაა პროექტმა მიიღოს 9 ან მეტი ქულა.
4. თანაბარი ქულების დაგროვების შემთხვევაში უპირატესობა ენიჭება იმ პროექტს, რომელიც ჯამურად მაღალ ქულას დააგროვებს თანმიმდევრულად პირველ და მეორე კრიტერიუმებში. სამივე კრიტერიუმში თანაბარი ქულების დაგროვების შემთხვევაში უპირატესობა მიენიჭება ნაკლები ბიუჯეტის მქონე პროექტს.

§2. კონკურსის ბიუჯეტის განაწილების წესი სამეცნიერო მიმართულებების მიხედვით

1. კონკურსის ბიუჯეტი ნაწილდება თითოეული სამეცნიერო მიმართულებისათვის შემდეგი პროცენტული მაჩვენებლებების მიხედვით:

სამეცნიერო მიმართულებები	პროცენტები
1. ზუსტი და საბუნებისმეტყველო მეცნიერებები	25%
2. ინჟინერია და ტექნოლოგიები	15%
3. სამედიცინო და ჯანმრთელობის მეცნიერებები	10%
4. აგრარული მეცნიერებები	5%
5. სოციალური მეცნიერებები	15%
6. ჰუმანიტარული მეცნიერებები	20%
7. საქართველოს შემსწავლელი მეცნიერებები	10%

§3. საუკეთესო პროექტების განსაზღვრის წესი სამეცნიერო მიმართულებების მიხედვით

1. საუკეთესო პროექტების განსაზღვრისათვის თითოეული სამეცნიერო მიმართულებისათვის 1, 2, ..., 7, გამოითვლება იმ პროექტების ქულათა საშუალო არითმეტიკული, რომელთაც საბოლოოდ მიიღეს 9 ან მეტი ქულა და შესაბამისად აღინიშნება $n_1, n_2, \dots, n_7$ -ით.
2. $n_1, n_2, \dots, n_7$ არის შესაბამისად 1, 2, ..., 7 სამეცნიერო მიმართულებების ქვედა ზღვარი.
3. პროექტებს, რომელთა შეფასებაც მეტია ან ტოლია შესაბამისი სამეცნიერო მიმართულებების ქვედა ზღვარზე, ეწოდებათ საუკეთესო პროექტები.

§4. კონკურსის ბიუჯეტის განაწილების წესი სამეცნიერო ქვემომართულებების მიხედვით

თითოეული სამეცნიერო ქვემომართულებიდან განიხილება მხოლოდ საუკეთესო პროექტები (იხილეთ § 3-ის 1-3 პუნქტები).

1. $\tau_{i,j}$ -ით აღინიშნება i -ური სამეცნიერო მიმართულების i,j ქვემომართულების საუკეთესო პროექტების რაოდენობა, სადაც $i = 1, 2, \dots, 7$.

2. თითოეული i,j ქვემომართულებისათვის განისაზღვრება $\lambda_{i,j}$ კოეფიციენტი შემდეგი ფორმულით:

$$\lambda_{i,j} = \tau_{i,j} / t_i, \quad i = 1, 2, \dots, 7$$

სადაც t_i არის i -ური სამეცნიერო მიმართულების საუკეთესო პროექტების რაოდენობა.

3. თითოეული i,j ქვემომართულებისათვის განისაზღვრება ბიუჯეტი შემდეგი ფორმულით:

$$\varphi_{i,j} = \lambda_{i,j} f_i, \quad i = 1, 2, \dots, 7$$

სადაც $\varphi_{i,j}$ არის i,j ქვე-მიმართულების ბიუჯეტი, ხოლო f_i წარმოადგენს i -ურ სამეცნიერო მიმართულების ბიუჯეტს (იხილეთ §2-ის პუნქტი 1).

4. თუ რომელიმე i,j ქვემომართულება არ შეიცავს საუკეთესო პროექტს, მაშინ ის დარჩება დაფინანსების გარეშე.

§ 5. პროექტის დაფინანსების წესი

1. თითოეული ქვემომართულებისათვის ცალ-ცალკე კეთდება ქულების მიხედვით პროექტების რანჟირებული სია.

2. ყოველ ქვემომართულებაში ფინანსდება მხოლოდ საუკეთესო პროექტები შესაბამისი რანჟირებული სიის მიხედვით (ზემოდან ქვევით), სანამ ქვემომართულებისათვის განკუთვნილი ბიუჯეტი იძლევა პროექტის სრულად დაფინანსების საშუალებას.

3. კონკურსით გათვალისწინებული ყველა სამეცნიერო ქვემომართულების რანჟირებული სიის მიხედვით (ზემოდან ქვევით) დაფინანსების შემდეგ, თითოეულ სამეცნიერო ქვემომართულებაში დარჩენილ თანხას ეწოდება ნაშთი, რომელიც აღარ ყოფნის რიგით მომდევნო პროექტს დასაფინანსებლად.

4. ფონდის გენერალური დირექტორის გადაწყვეტილებით, ქვემომართულებებიდან დარჩენილი ნაშთების ჯამის განაწილების შესახებ რეკომენდაციების მომზადების მიზნით, იქმნება სპეციალური სათათბირო ორგანო - საბჭო, რომელიც დაკომპლექტდება სსიპ - შოთა რუსთაველის საქართველოს ეროვნული სამეცნიერო ფონდისა და საქართველოს განათლების, მეცნიერებისა და ახალგაზრდობის სამინისტროს წარმომადგენლებისგან.

5. საბჭო რეკომენდაციის გაცემის შესახებ გადაწყვეტილებას იღებს ხმათა უმრავლესობით, რომელიც ფორმდება ოქმის სახით და წარედგინება გენერალურ დირექტორს.

6. საბჭო თავისი ცოდნის, გამოცდილების, კომპეტენციისა და შეხედულების საფუძველზე:

ა) განსაზღვრავს კონკურსის სამეცნიერო ქვემომართულებებს შორის ყველაზე პრიორიტეტულ ერთ ან რამდენიმე ქვემომართულებას;

ბ) გასცემს რეკომენდაციებს ნაშთების ჯამის გადანაწილების შესახებ პრიორიტეტულად განსაზღვრულ ერთ ან რამდენიმე ქვემომართულებაში (რანჟირებული სიის მიხედვით).

7. საბჭოს რეკომენდაციების საფუძველზე გენერალური დირექტორი იღებს საბოლოო გადაწყვეტილებას ნაშთების ჯამი გადაანაწილოს სამეცნიერო ქვემომართულებებს შორის ერთ ან რამდენიმე ქვემომართულებაში (რანჟირებული სიის მიხედვით).

8. თუ რომელიმე გამარჯვებულ პროექტთან ვერ მოხერხდება ხელშეკრულების გაფორმება, მაშინ მის ნაცვლად დასაფინანსებელი პროექტის შერჩევა განხორციელდება საბჭოს მიერ, რომლის რეკომენდაციის საფუძველზე საბოლოო გადაწყვეტილებას იღებს გენერალური დირექტორი.